

“Nunani avannarlerni killeqarfinni akimmiffiusartut peerneqarnissaat pillugu nalunaarusiaq”

Saqqummiussissut

(Ilinniartitaanermit, Ilisimatusarnermit Nunanullu Avannarlernut Suleqateqarnermit Naalakkersuisoq.)

Naalakkersuisut sinnerlugit killeqarfinni akimmiffiusartut pillugit nassuiaat saqqummiutilernerani siullermik Inatsiartuni siulittaasoqarfik qujaffiginiaqpara, suliniut tamanna pillugu aallarniisimaneranut. Oqaluuserisassaq tamanna ualeq manna suliarilerutsigu, naatsorsuutigissavarput, nunani avannarlerni inatsisartut tamarmik sammisamik taassuminnga suliarinninnertik naammassereersimassagaat. Siullermeersoraara nunat assigiinngitsut Nunani Avannarlerni Siunnersuisooqatigiinni ilaasortaasut angusimassagaat nunani avannarlerni sammisamik ullutsinni saqqumilaartumik inatsisartuminni ataasiakkaani ataatsikkoortumik oqaluuserinnissimanissaat.

Soorlu nassuiaammi saqqummiunneqartumi takuneqarsinnaasoq sammisat tamanna Naalakkersuisut tungaannit nunani avannarlerni maannamut iliuuseriniakkatsinni taannaasimanngitsoq salliutillugu pingaartinneqarsimasoq. Tamannalu aamma isumaqarpoq, suliaq tamanna nunani avannarlerni Killeqarfinni akimmiffiusartut pillugit ataatsimiititaliami salliutissimanngikkippat. Akerlianilli killeqarfinni akimmiffiusartut pillugit apeqqutit Naalakkersuisut nalinginnaasumik sulinerannut ilaappat. Assersuutini nassuiaammi saqqummertuni takuneqarsinnaavoq qanoq ilillutik nunat avannarliit nunallu assigiinngitsut isumaqatigiissutaasa piviusunngortinneqarnerisigut killeqarfinni akimmiffiusartut pilernissaannik pinaveersaartitseqataasinnaanerat.

Ukiut arlallit qaangiuttut WTO-mi peqataanerput nalunaarutiginiukuurput, Naalakkersuisunilu aalajangiusimavarput tunngaviusumik siunnerfik tassaasoq, nunarsuarmi aningaasaqarnikkut sulinermi ammasumik peqataaneq – ataatsimut isigalugu – nungusaataanngitsumik ineriartortitsineq pillugu anguniakkatta piviusunngortinneqarnissaannut tunngavissaasoq, ima kinguneqartussaq inuiaqatigiinnik, aningaasaqarnikkut, inuuniarnikkut kultureqarnikkullu nammineersinnaasunik aammalu nunarsuarmioqatigiinnermi pissusissamisoorumik inissaminut inissinnaasunik.

Tamanna ilutigalugu aamma ersarippoq, nunat tamarmik immikkoortortaartut ima isumaqartunik, inuiaqataaffigisap ingerlanneqarsinnaaneranut apeqqutaasoq, nioqqutissanik, inunnik allanillu avataaneersunik nunamut eqqunneqartunut killilersuuteqarsinnaaneq. Tamanna aamma uatsinnut atuuppoq, assersuutigalugu Inatsisartut piffissap ilaani oqaluuserisavaat immikkuullarissumik inatsisiliornissaq ”annertuunik sunniuteqartussanik ingerlatanik” taaneqartartut pillugit. Tamanna assersuutaavoq, Naalakkersuisut pisariaqartippassuk ingerlatamik naleqqussaaniassaq, tamanna inuiaqatigiittut angissutsitsinnut sanilliullugu annertooujussuarnik atortussanik inunnillu isumalluutissanik eqqussinissamik piunasaqaatitaqassapat. Matumani pingaaruteqarpoq uagut ineriartorneq aqukkutsigu, taamaasilluni nukinnit avataaneersunit aqunneqalinnginniassagatta.

Taama oqaaseqarlunga qilanaaraara ullumikkut oqallinnissaq tusarnaassallugu peqataaffigissallugulu, taamaasilluni Inatsisartunit kissaatit ilanngussinnaassagatsigit Naalakkersuisut nunani avannarlerni nunanilu allani suliamik ingerlatitseqqiinissaanni.

Oqaaseqarninnut qujavunga.